



# The Holy See

---

IOANNES PAULUS EPISCOPUS  
SERVUS SERVORUM DEI  
AD PERPETUAM REI MEMORIAM

CONSTITUTIO APOSTOLICA **BELFORTIENSIS-MONTIS BELIGARDI\*** NONNULLIS DETRACTIS  
TERRITORIIS AB ARCHIODECESI BISUNTINA,  
NOVA DIOECESIS CONDITUR, BELFORTIENSIS-MONTIS BELIGARDI NOMINE

Qui divino consilio Ecclesiae universae praepositi sumus, nihil aut sollemnius aut sanctius habemus, quam ut christiano populo apte provideamus. Qua re, cum Venerabilis Frater Marcus Lallier, Archiepiseopus Bisuntinus, audita Conferentia episcopali Galliae, ab hac Apostolica Sede petierit, ut divisa archidioecesi Bisuntina, nova dioecesis conderetur, Nos, consilio quidem petito a Venerabili Fratre Egano Righi Lambertini, olim Archiepiscopo titulo Docleensi atque in Gallia Apostolico Nuntio, re bene reputata, sequentia statuimus. Ab archidioecesi Bisuntina integrum territorium detrahimus, ut lege civili finitur, regionis vulgo «Belfort» nuncupatae, partem provinciae «du Doubs» quam appellant « Pays de Montbéliard », et pagum « Héricourt » cum municipio « Chalonvillars » ; quibus terris simul sumptis novam dioecesim constituimus, Belfortensem-Montis Beligardi cognominandam, cuius sedem in urbe Belfort ponimus, cathedra in templo Sancti Christophori collocata in eadem urbe, quam iustis cathedralium templorum honoribus honestamus. Eandem praeterea suffraganeam facimus metropolitanae Sedis Bisuntinae a qua tracta est. In nova Ecclesia Canonicorum Collegium condatur iuxta morem in regione vigentem et normas opportuno tempore edendas ; interim tamen dioecesani Consultores elegantur, Episcopum consilio atque ope iuvaturi. Mensam constituant sive fidelium collationes, sive bonorum pars quae dioecesi Belfortensi-Montis Beligardi obvenient, ad canonem 1500 C.I.C. Ad Seminarii erectionem quod attinet, ac iuvenum institutionem quod pertinet, serventur praecepta iuris communis, leges a Sacra Congregatione pro Institutione Catholica latae, ratione nempe habita decreti Concilii Vaticanii II «Optatam totius». Dioecesi vero condita, sacerdotes atque Seminarii tirones ita collocentur, ut qui beneficium vel officium in nova dioecesi habeant, eidem assignentur ; ceteri vero, in qua legitime degant. Acta et documenta quae Sedem cathedralem Belfortensem-Montis Beligardi respiciant, ad eius Curiam mittantur, religiose custodienda in archivo. Ceterum, quae per has Litteras iussimus, Venerabilis Frater Angelus Felici ad exitum deducet, vel quem ipse delegaverit, factis

nempe potestatibus necessariis. Re vero acta, documenta exarentur quorum digna fide exempla rite signata ad Sacram Congregationem pro Episcopis mittantur. Contrariis nihil obstantibus.

Datum Romae, apud S. Petrum, die tertio mensis Novembris, anno Domini millesimo nongentesimo septuagesimo nono, Potificatus Nostri altero.

AUGUSTINUS Card. CASAROLI  
*a publicis Ecclesiae negotiis*

SEBASTIANUS Card. BAGGIO  
*S. Congr. pro Episc. Praefectus*

Iosephus del Ton, *Protonot. Apost.*  
Marcellus Rossetti, *Protonot. Apost.*

---

\*AAS, vol. LXXII (1980), n. 1, pp. 23-24.

---